

La dolînta et l'ireudze

L'âré on cou, din on dolein velâdzo, na fameulhe avouei ché's infant. La plhe grânta l'âvé shein an, faut dré l'a zu tré menio d'on cou. Le pâré l'âré ovra din n'usîna et l'âvé pas preu d'ardzein po balhé à maindgé à teûta sa fameulhe. E volâvé plashié sa plhe granta gamine, Emilie, ailleu yau é poreu travalhé dieuste po maindgé. Mais nion din le velâdzo l'âvan de travau po sa dolînta

De coûté le velâdzo, l'a y avé on yeeu menio, Vincent, que vivâvé de per lui et que nion n'allâvan le vè. Quemin nion le cogniéssâvé bain, tui mouesâvan que l'âré on ireudze que portâvé le maleu yau itâvé. Dou tré cou pèr an, é veniâvé bas eu velâdzo po atséta cein que l'âvé fan. Qua é veniâvé, les dzin coterdjévan déra lui et l'an invinchenau au mouei d'histoiré, teûté plhe crouille les one que les âtré. Nion volâvan dévesa avouei cei boûgro, Vincent l'é devenu todzo plhe de per lui et mau amau.

Le déra cou que l'é venu ba pei le velâdzo, é l'a avoui l'histoiré d'Emilie et de sa fameulhe et que nion volâvé la preindré ver lieu. Aprè îtré tcheurnau vei l'otau, é l'a consterau à sein et s'é deu que l'âvé preu de to po preindre sa dolînta vei lui. Pa, l'areu cacon avouei quau dévesa, pa poreu s'occupa de sé beîтчé. Vincent l'âvé dôlhé vâtsé, houé tchévré, neeu fâyé, de les dzeuneulhe, on tsain, et quatre tsa. On mouei de tartou po ne sacau de per lui

Le leindeman la décidau d'alla vè le pâré d'Emilie po la demanda se poreu preindré sa feulhe vei lui, é la deu que l'âvé preeu de to pou dou et que l'amereu bain ava n'aidje po son travau. Le pâré l'a répondu qu'allâvé contera et pa, que la tchernereu dré.

Di vei le ta, le pâré et la mârê l'an dévesau de cein; le pâré volâvé pa laché alla sa feulhe vei cei ireudze, que Vincent volâvé dieuste profita de lhieu maleu ! Mais la mârê mûsé qu'on peeu pa dré cein de cei homo, nion le cogné bain et que peut-être les dzin dion on mouei de tsouse sein sava, et que cei Vincent l'é venu ba expré po no dré cein, l'é peut-être pas se monien qu'à cein, pa fau dré on peu pa vouarda Emilie, avouei lous tré dolein que sont arrevau, n'ein pas preeu po baillé à maindgé à tui. Se Vincent l'a preeu quemin le di, Emilie saré bain vei lui.

Le pâré, résignau, l'a deu a Emilie cein qu'allâvé se passa. La dolînta l'âvé poîré de Vincent, avouei to cein que la avoui. Mais son pâré l'a deu que l'âré daînsé pa l'é to ! Teûta la noei, la dolînta l'a plhorau din son lié, é volâvé pamei sayi foueu de l'otau, la grossa poîré d'incontra cei ômo

Le leindeman matain, le pâré l'a pra Emilie avouei doupa de son galhin, et l'an itau vè cei Vincent.

Lous premier dzo l'âré pas iseeu po nion ... Emilie l'âvé poîré de Vincent et sa fameulha manquâvé on mouei; Vincent sâvé pas quemin on fait aouvei na dolînta et le pâré l'âré pas sûro d'ava pra la bouena décijon... mais lous dzo on passau, les tsoûsé allâvan de mio ein mio. Emilie la zu vîto apra po s'occupa de les beîтчé et pa é l'âmé cein : moîdré les vâtsé, les tchévré et les faye, balhé de les gran-né a les dzeneuillé, avesa les tsa bâré le lashé... E dévisé teûta la dzornîva avouei les beîтчé, é l'a todzo ne sâthié à yeu dré ! Mé l'âré pa se iseeu avouei Vincent ... Pou a

pou, Emilie la apra à le conietre et la yu que l'âré pas asse croei que les dzin desâvan. E l'âré meïmo to le contreïro !

Et Vincent assebein l'a apra on mouei avouei Emilie; d'êtré de per lui, l'âvé eublho on mouei de touse, quemin falâvé eïtré avouei lous âtro.

Quaque teimp plhe ta, Vincent tcheurné ba eu velâdzo avouei la dolînta. E les dzin dévesâvan todzo de mau su lui ... Qua Emilie l'a avoui na yélha dré "Quain ta pourra dolînta de sopra avouei cei ômo !" é le la deu "Le plhe ireudze des dou l'é vo de dévesa quemin cein de cacon qu'on cogné pas ! Qu'a on sa pas, on di rein !". La yélha l'âré graindze, que n'a gamine oûsa la dré de les tsoûsé dainsé ! Mais plusieu que l'an avoui cein é l'an consterau et se sont deu qu'Emilie l'âvé pas l'ai malheureûsa avouei Vincent, que l'aré bain teneu et que l'âvé peut-êtré bain rason !

Di adon, pas mé nion ba eu velâdzo dévesâvan de mau di déra à Vincent. L'a y ein a meïmo dâvoué tré perseuné que son alla amon vei lui po vè cein que se passâvé et coterdjé na vouarbe.

Emilie l'é sobrau on an et demi amon vei Vincent. Après son pâré l'a trovau on âtro travau yau é l'âré paya, et teûta la fameulhe l'âran de novei einsemblho.

Par Mimosa

*annonçant le
printemps*